

忠

節

錄

忠節錄序

嘗攷遜國諸臣仗節死義與  
藏名遠舉者至不可勝數蓋  
自天地剖判以來所未嘗有  
也然世無敢頌言其忠者迨  
今上登極詔下大京兆始仰承

德意建祠治城錄其尤著者百  
十有八人春秋祀之旌羣哲  
之義烈化兆人之肝膽修二  
百年之軼事挽千萬世之頽  
風嗚呼盛矣但事舉一時不  
無闕略少宰李公廷機少宗

伯葉公向高增入若干人項  
大鴻臚張公朝瑞以舊京兆  
攝府事顧瞻祠宇慨然興歎  
謂當時事蹟散見他書者尚  
多有之乃芟繁剔僞合為一  
編復增入者若干人於是幽

潛悉著祀典大備而知公之  
摩世厲鈍者意深遠矣以余  
夙奉周旋感激名義乃出以  
眎之而并屬為序余竊惟

高皇帝剪除兇殘鴻業未固必

得

大聖人繼起乃能定之微獨  
國朝為然漢唐宋統一天下  
皆有太宗乃克永世籍第令  
如盈如建成如德昭必無幸  
矣由此言之

文皇帝始天之所興以長我王

國非偶然也當是時使中外  
臣工人人楊蹇爭攀龍鳳之  
馭絕跡羊豕之羣豈不竹帛  
可期身名俱泰哉顧二心鮮  
媿百羣皆奔天柱折而將傾  
人網弛而莫振究且貴富熏

心廉恥道喪國亦奚賴焉故  
殷湯立而務光沈於淵周武  
興而夷齊去之西山孔子曰  
湯武順乎天應乎人而又曰  
伯夷叔齊古之賢人也蓋三  
子非湯武節不顯湯武非三



子祚不昌豈非其道寔有相  
成者哉余鄉陳諒之弘治中  
為武選得諸臣事於故牘中  
銓次為集家世寢遠書以不  
存余嘗恨之近得十數家又  
詳略殊方舛誤錯出得公一

加勘定勒為不刊自是忠魂  
揭於日月烈氣長為風雷足  
令括囊全軀懷姦嫉善者誦  
其言論其世即幸迤於指視  
寧無忤於衾影然則世之回  
其頑鄙勉為忠孝者未必非

此書力也公博雅好古遇事  
成書嘗輯貢舉考南國賢書  
孔門傳道集皆有裨風教而  
此編爲尤著云

萬曆壬寅冬日翰林院脩撰  
儒林郎直

起居注

國史

講筵官瑯琊焦竑序

忠節錄凡例

一建文死義諸臣在

文皇已有彼食其祿自盡其心之語嗣是

列聖表章于今益著人人得頌言之蓋以彰往  
事勸來者非獨諸臣沒後之榮也故以

褒綸爲首

一革除紀事不下十數種異同詳略往往有  
之今酌其近實者彙爲一編有的無證據  
者削之

一諸家序次不一或以誅死自死分門或以死難死事爲目未敢盡從人臣事君有死無貳總之無愧於心無愧於道而已不當過爲分別表忠祠奉

詔而作今錄一以文武位秩爲敘尊

朝廷也

一舊惟死事者祠祀餘悉不與竊意人臣盡心效力責在於我至時與地不必盡同如夷齊扣馬一諫去隱西山亦豈必死之爲

快哉記曰謀人之軍師敗則死之謀人之  
家國危則亾之如方黃齊練諸人誠難自  
諉至於彭與明葉希賢與夫二樵八梁者  
流遯跡窮陬行求故主終身萬苦而不悔  
此其人旣全君臣之義不貽族屬之災亦  
足以愧世之爲丁公而苟富貴者矣故並  
爲增入

一攷是時有兩盧振一爲朝官一爲燕屬舊  
錄偏有所遺今分之又盧珙卽盧迥胡子

韶卽胡子昭之類舊錄再見今合之其黃  
清黃彥清葉希賢雪菴和尚之類或曰一  
人或曰二人然攷其官爵死事各別今姑  
兩存之

一建文諸臣有前見用事而于難不及後見  
歸附而于節未著者並載舊編今削之蓋  
諸家欲以備朝典故不得不詳此集專以  
表臣節故不得不覈義固各有攸當也

一革除諸事近世始出如王詔得於僧寮輪



藏楮毀字浥之餘則其泯滅不傳者不可  
勝數矣存者先後牴牾傳聞疑誤固宜不  
無與過而廢之寧過而存之今輯錄意也  
一自所傳數家外如邊昇得於中州人物志  
徐子權得於臨川志丁大方得於山東志  
松石得於四明文獻志此類甚多則耳目  
所遺寧無挂漏尚望博雅君子竄定之

凡例畢

忠節錄引用書目

革除錄福建宋端儀輯

備遺錄江西張芹輯

忠賢竒秘錄浙江王詔輯

續備遺錄湖廣何孟春輯

羣忠事略

備遺錄補浙江馮汝弼輯

建文事蹟

革除遺事廣東黃佐輯

革朝遺忠錄浙江杜思輯

革朝遺忠列傳福建鄭應旂輯

遺忠錄郁襄輯

建文遜國記遜國臣記浙江鄭曉輯

遜國記中尉睦樗輯

皇明表忠錄湖廣汪宗伊輯

革朝志革朝五忠傳海鹽許相卿輯

山東壬午死事七忠傳浙江周應治輯

萃忠集

忠節錄目錄

首卷

綸音

第一卷

太子太傅魏國公徐輝祖

越雋侯俞通淵

大將軍長興侯耿炳文

駙馬都尉灤城侯李堅

歷城侯盛庸

駙馬都尉總兵官梅殷

駙馬都尉都督僉事耿璿

## 第二卷

翰林院文學博士方孝孺

附魏澤

王稔

吏部尚書張統

太子少保禮部尚書陳迪

兵部尚書齊太

兵部尚書鐵鉉

刑部尚書侯太

刑部尚書暴昭

吏部侍郎毛太

戶部侍郎卓敬

戶部侍郎郭任

戶部侍郎盧迥

禮部侍郎黃魁

禮部侍中掌尚寶司事黃觀

兵部侍郎邊昇

兵部侍郎陳植

兵部侍郎徐垕

刑部左侍郎張曷

刑部左侍郎胡子昭

御史大夫練子寧

御史大夫景清

副都御史茅大方

副都御史陳性善

僉都御史司中

巡撫都御史黃清



太常寺卿兼翰林院學士黃子澄

大理寺左少卿胡閏

附女郡奴

太常寺少卿廖昇

太常寺少卿盧原質

太常寺少卿兼翰林院學士高遜志

大理寺丞鄒瑾

大理寺丞劉端

大理寺丞王高

大理寺左寺丞彭與明

春坊大學士林右

左拾遺戴德彝

翰林侍讀樓璉

翰林院脩撰王叔英

翰林院編脩王良

翰林院編脩程濟

翰林院編脩陳忠

衡府紀善翰林院纂脩官周是脩

戶科都給事中龔泰

禮科左給事中黃鉞

附楊福

戶科給事中陳繼之

戶科給事中韓永

監察御史甘霖

監察御史高翔

監察御史謝昇

監察御史丁志方

監察御史曾鳳韶

監察御史魏冕

監察御史董鏞

監察御史王度

監察御史葉希賢

監察御史王玘

監察御史韓郁

監察御史王彬

監察御史鄭公智

郎中梁田玉

戶部主事巨敬

兵部主事樊士信

刑部主事徐子權

參大將軍事前府左斷事高巍

宗人府經歷宋徽

國子監博士黃彥清

中書舍人梁良玉

中書舍人何申

中書舍人宋和

中書舍人郭節

第三卷

燕府長史葛誠

寧府長史石撰

晉府長史龍鐔

谷府左長史劉景

遼府左長史程通

秦府長史鄒朴

燕府伴讀余逢辰

浙江肅政按察使王良

四川按察使李文敏

河南布政使司參政鄭居貞

江西按察副使程本立

北平按察僉事湯宗

陝西按察僉事林嘉猷

山東按察僉事胡子義

袁州知府楊任

蘇州知府姚善

徽州知府陳彥回

徽州知府黃希范

知府葉惠仲

寧波知府王璉

衛輝知府孫鎮

常州府同知石允常

松江府同知某

賓州知州蔡運

沛縣知縣顏伯瑋

附子有爲

獻縣知縣向朴



蕭縣知縣鄭恕

樂平知縣張彥方

漳州府學教授陳思賢

附生員

伍性原  
鄒君默

陳應宗  
曾廷瑞

林珏  
呂賢

濟陽縣學教諭王省

附子禎

沛縣主簿唐子清

東平州吏目鄭華

沛縣典史黃謙

永清縣攝縣事典史周縉

附朱寧等

進士陳周

應天舉人劉政

濟陽縣學貢士高賢寧

第四卷

都督廖鏞

守居庸關都督余瑱

中軍都督府都督同知陳質

鳳陽守將都督同知孫岳

前軍都督府都督僉事耿璿

副總兵都指揮使瞿能

錦衣衛都指揮使宋忠

守薊州都指揮馬宣

附鎮撫曾濬

北平都指揮使謝貴

北平都指揮彭二

北平都指揮彭聚

北平都指揮孫太

西涼都指揮莊得

北平都指揮使楚智

都指揮張皂旗

行都司都指揮朱鑑

大寧守將卜萬

都指揮楊松

都指揮唐禮

燕山護衛指揮盧振

指揮小馬王

河北指揮張倫

指揮王資

楊州衛指揮崇剛

崇一作鄧

府軍右衛指揮使宋瑄

府軍右衛指揮僉事趙諒

衛鎮撫徐讓

衛鎮撫衛健

錦衣衛鎮撫楊本

燕山左護衛千戶倪諒

錦衣所鎮撫周拱元

附都督徐凱等

第五卷

盧振

周璿

牛景先

馬坤

梁良用

郭良

梁中節

何洲

燕山衛卒儲福

附妻范氏

金川門守卒龔翊

馮翁

王公

雪菴和尚

雲門寺僧

東湖樵夫

耶溪樵夫

河西傭

川中補鍋匠

第六卷

考誤

目錄終



忠節錄首卷

綸音

一永樂元年八月得建文時羣臣封事千通  
命解縉等檢閱凡言兵食事宜者留覽其  
詞涉干犯者悉焚不問

一是年十一月都御史陳瑛請治建文諸死  
事臣

文皇帝曰彼食其祿自盡其心爾勿問又曰諸  
臣盡忠于我

太祖故盡忠于建文

一永樂十一年正月

詔法司解建文諸死事臣禁令

一永樂十四年

諭法司奸惡齊黃等遠親未拿者悉宥來告者  
勿理

一永樂二十一年十一月

詔諭禮部尚書呂震盡赦諸死義者家屬復給  
還田產於是稍稍有敢言建文時事者諸

死義家人亦稍稍復還廬里時吉水人錢  
習禮故練子寧姻戚雖一時脫禍而恒爲  
讎家所持舉族不敢一吐氣習禮以告楊  
榮一日獨對畢卽以其事白

上

上欣然曰立賢無方便練子寧尚在朕固當用  
之况習禮乎由是得釋

一

仁皇帝卽位之歲十一月

諭禮部尚書呂震曰建文中諸臣受顯戮者其家屬初發敎坊司錦衣衛浣衣局并習匠或功臣家爲奴今有存者旣經大赦並放原籍爲民給還所沒田土

一洪熙元年

仁皇帝撰長陵碑文建文君雖已追廢猶稱曰君書其沒猶曰崩當其在位時猶尊之曰朝廷又

諭羣臣曰若方孝孺輩皆忠臣忠臣宜有傳不

書則何以示勸

詔從寬典於是天下始敢稱孝孺諸死義者爲忠臣云

一

睿皇帝天順元年釋建庶人繫令其自便

一弘治中台州府人繆恭學古行高晚年走京師上六事其一請繼絕屬封建庶人後爲王奉懿文太子祀通政司官見恭奏大駭罵恭何爲自速死繫恭兵馬司獄劾上

敬皇帝

詔勿罪放恭還鄉

一嘉靖十四年給事中楊僕䟽請表揚建文  
時諸死事臣

肅皇帝卽下禮部議且召禮官問曰昨給事中  
楊僕言建文時諸臣事若何夏言獨爲沮  
抑明日上議寢不行

上亦不罪僕

一隆慶六年

今皇帝御極。

詔內一款革除間被罪諸臣忠于所事甘蹈刑戮有死無二此皆我

太祖高皇帝所儲養忠臣義士我

成祖文皇帝當時亦有練子寧若在朕猶當用之之語是諸臣罪雖不赦心實可原朕今仰遵我

聖祖遺意褒表忠魂激勵臣節詔書到日各地方有司官查諸臣生長鄉邑或特爲建祠

或附本處名賢忠節祠歲時以禮致祭其墳墓苗裔倘有存者厚加卹錄

一萬曆十二年御史屠叔方奏爲忠臣已褒外親未宥乞

聖恩推廣

明詔大慰忠靈以培

聖代綱常事

命下禮部議議覆委應遵奉先年

詔旨及依御史屠叔方所奏以慰忠魂以激臣



節

俞旨行之

一萬曆二十三年給事中楊天民題爲累朝  
缺典究竟難湮懇乞

聖明及時脩舉以成祖德以光信史事御史牛  
應元題爲國史肇脩缺典當正懇乞

聖明斷在允行以信天下萬世事各奏稱建文  
年號向奉革除累代因循未經議復乞下  
該部改正禮部議覆得

忠節錄卷之一

太子太傅魏國公徐輝祖

徐輝祖中山王達長子初名允恭

太祖賜名輝祖身長八尺五寸顧盼有神舉止儼雅洪武二十一年嗣魏國公二十六年遣諭北平防胡明年練浙江海上兵防倭二十九年命會禮部翰林院試國子師生秬第其優劣送吏部銓用輝祖嘗侍皇太子諸王學通經史又從詹希元學書建文君尤所信任

時建武學於京師教將臣子弟輝祖與駙馬  
都尉梅殷往來提督絃誦大興嘗召對密言  
事兼太子太傅

高廟崩諸王世子及郡王在京遺命三年喪畢  
遣還靖難將起兵世子及漢趙兩郡王留京  
師乃稱病篤以三子請朝議以遺詔不許旣  
而屢請帝以中山王女燕藩正妃召輝祖及  
其弟增壽議之輝祖執不可增壽獨力爲庇  
乃悉遣歸北師起其世子高陽王皆陰餌公

爲內應公確然不撓乃改餌公叔弟公日與  
齊太黃子澄盧振張曷葛誠通謀議督諸兵  
北進屢戰有功尋召還城守靖難兵至江上  
輝祖又與開國公常昇分道出師禦戰將士  
往往離散不前力屈而返金川門潰輝祖仍  
率兵巷戰遜國後羣臣勸進輝祖獨不屈下  
吏令自書罪狀惟言中山開國功耳

文皇大怒勒罷尋幽繫而卒年四十或云自裁  
文皇曰輝祖與齊太輩罪同宜論死朕念中山

王平定天下有大功不可無後令輝祖子嗣  
魏國公通給中山王歿後祿輝祖長子釋迦  
保見賜名欽嗣魏國公遂乞守墓

上怒謫居中都輝祖弟增壽素通款于北平王  
午兵入金川門建文君手刃增壽于左順門  
謚武陽忠愍侯贈定國公輝祖子孫恩數視  
增壽常差薄云萬曆初詔錄建文死事者各  
以官稱廟祀之金陵而輝祖居首

越雋侯俞通淵

俞通淵廬州巢縣人以父河間郡公廷玉兄  
號國忠烈公通海南安侯通源故得充叅將  
侍舍人從大將軍征秦隴燕趙功陞督府僉  
事征哈喇哈至捕魚兒海獲酋長人畜尋轉  
餉江西充偏將征都勻龍場諸蠻克辰沅寶  
慶俘獲多封越雋侯統兵討建昌叛賊城越  
雋二十六年坐累奪侯還鄉建文初召見曰  
老將也授豹韜衛指揮使充偏將從大將軍  
禦靖難兵敢戰有功白溝河之役諸將兵大

敗通淵遂歿于陣建文君哀悼加卹賜葬南門外聚寶山而命其子靖嗣官尋卒幼子端優給錦衣未幾亦卒靖難後家人懼禍不敢言襲替事建文末諸將校往往失世官也

### 大將軍長興侯耿炳文

耿炳文濠州人父君用至正壬辰江淮雲擾所在盜賊充斥君用彷徨無所歸謂炳文曰吾父子與其伏山林歛手就戮曷若求豪傑而往輔之乃以是歲八月謁

高皇於濠城一見被知遇授君用管軍百戶甲午四月領軍隨

上取滁州六月取城口張營寨取嘉山繆把頭寨七月克滁城守禦授管軍千戶乙未閏正月從

上取和州守禦授明威將軍管軍總管三月濠舊帥孫德崖乏糧就食於和因與郭子興有隙甫至卽他往

上送之行德崖軍多蓄異志



上大驚疑炳文翼衛甚至竟保無他六月朔從  
上渡江風順舟駛頃刻拔采石乘勝徑取太平  
守禦時元中丞蠻子海牙集樓船結砦采石  
衆數萬陳也先子兆先合淮兵二十萬屯營  
方山水陸相望丙申二月從克采石寨獲兵  
萬餘三月一日破兆先陸寨降其衆十日取  
金陵守禦聚寶門父子相從領軍十七日同  
父隨徐達取鎮江守禦四月君用奉命統兵  
援常之宜興是地與張士誠界勢所必爭各

柵木自營盡死以守君用賈勇騰柵而上創甚巨猶力戰不休竟死炳文襲父職仍領其軍六月取廣德丁酉二月取長興張士誠將趙打虎以兵三千迎戰敗之追至城西門打虎走湖州遂克長興獲戰船三百餘艘禽士誠守將李福安荅失蠻等義兵萬戶蔣義率所部二百人降有儒士溫祥卿者避亂挈家來歸炳文與語奇之留贊軍事用其策分兵據要害設戰具爲守禦計三月攻長興州爲

長安州立永興翼元帥府以炳文爲總兵都  
元帥守之五月士誠遣其左丞潘原明元帥  
嚴再興來寇屯上新橋炳文擊敗之生擒數  
百人斬首甚衆原明等遁去踰四年辛丑十  
月士誠復遣司法李伯昇率衆十餘萬水陸  
並進寇城下城中兵僅七千敵勢甚盛

上命帳前都先鋒陳德等率建康兵元帥華高  
等率宜興兵萬戶費聚等率廣德安吉兵往  
援之比至寇兵夜劫營諸軍皆潰炳文嬰城

固守明日遣左副元帥劉成出西門迎擊敗之禽其將宋元帥等成追至東門敵軍下瞰城中運土石填壕隍放火船燒水關攻城益急炳文於城中晝夜相持凡月餘旣而援兵至伯昇棄營遁追斬五千餘人甲辰九月改永興翼元帥府爲永興衛親軍指揮使司以炳文爲指揮使十月士誠丞相張士信以兵來侵炳文破之獲其元帥宋興祖士信憤怒復益兵圍城炳文復與指揮同知費聚出戰

敗之自是士誠奪氣不復敢圖長興矣炳文  
守長興凡十年孤城血戰卒以無虞其功最  
大丙午八月

上命伐張士誠先取湖州調炳文往十一月湖  
州平進圍蘇州諸將分門而軍炳文軍城東  
北四面困以長圍又架木塔築層樓置弓弩  
火器於上復設巨砲以擊之城中震恐敵兵  
屢出挑戰屢衄而入吳元年九月城破士誠  
就擒論功賜采段表裏陞大都督府僉事冬

從征中原克山東沂益諸州郡明年

上卽位改元洪武進功臣秩授鎮國上將軍兼  
右率府副使三月克汴梁四月克河南府五  
月召回扈從車駕北巡七月還京師九月同  
常遇春克大同十月克懷慶澤潞二州十一  
月大同守禦十二月拔平陽克太原二年二  
月以其軍從大將軍達征陝西時兩軍夾武  
功東川而陣思齊在其東思道壘其西日數  
挑戰蓐食以俟衣甲不少解如是者數月思

齊輩力不支相與遁去達旣得其地卽以炳  
文守之嚴號令練軍伍築涇陽縣洪渠堰又  
渠十萬三千餘丈民皆利焉是年冬大賞守  
禦功有白金文幣之賜三年正月開設秦王  
府授府左相直言正色多所匡正六月開陝  
西等處行中書省命以左相兼行省右丞階  
資善大夫尋開行大都督府命署都督僉事  
十一月大封功臣授開國輔運推誠宣力武  
臣榮祿大夫柱國秦王府左相兼陝西行省

右丞封長興侯食祿一千五百石賜鐵券仍  
賜文綺及帛四十疋五年以後皆鎮陝西十  
三年十二月故元平章乃兒不花等寇邊

上命炳文領軍輔大將軍達討之賜鈔百錠遣  
行四月至塞外大破虜於北黃河俘獲人馬  
數多悉送達所十五年七月詔遣巡視陝西  
城池督軍屯田十二月炳文計劃訓練陝西二  
十二衛校卒凡十萬六千八百七十四人得  
驍勇騎士一萬九千七百九十人習馬二萬



三千五百匹十六年雲南平命往喻征南將軍  
賴川侯傅友德班師兼視城堡郵傳籍軍數  
田糧十九年從征雲南二十年討曲靖普安  
諸蠻寇平之二十一年同定遠侯北征獲故  
元餘孽及後宮妃后於捕魚兒海

上賜鐸鎚五萬錠與造第鳳陽鈔二千錠葺  
塋黃金四錠白金四十錠鈔一千錠文段表  
裏三十疋復推榮其三世父君用贈榮祿大  
夫同知都督府事封長興侯二十五年陝之

兩當縣妖人作亂率兵聲討三年始克之三十年蜀盜爲亂以征西將軍往討之禽賊首高佛興俘其衆三千餘人以獻明年鎮守遼東建文改元靖難兵起命炳文佩大將軍印自遼東率衆二十萬援真定與北將張玉朱能戰炳文大敗奔還滹沱河東衆尚數萬十月復戰衆皆潰炳文死於陣年六十有五炳文老將善戰至是亦敗歿建文始有憂色代者益非其人竟至於亡子璿璵皆都督僉事

有傳瑄散騎舍人擢尚寶卿皆獲罪死

駙馬都尉灤城侯李堅

李堅河南武涉人洪武中以功臣英子選尚大名公主爲駙馬都尉堅素負才勇建文中充左副將軍從長興侯耿炳文北征遇靖難兵諸將謹備西北北兵突擊出不意破西南炳文大敗北將丘福進攻堅出接戰互有勝負封堅灤城侯食祿千五百石與世券已而兵敗濬沱河薛祿引渠中堅墜馬祿揮刀直

向堅堅大呼我李駙馬勿殺祿擒堅見

文皇謂曰爾至親今至此奈何堅無降附意命械送北平道卒子莊以公主故特宥當嗣公主懼禍繳誥券莊流寓南京詩酒終其身

### 歷城侯盛庸

盛庸不知何許人靖難兵起充叅將從長興侯數失利長興侯召還又從曹國公轉戰燕齊間互有勝負建文二年七月鐵鉉守濟南庸夜出劫戰晝憑城防禦盡毀北兵諸攻具

捷聞卽軍中陞鉉兵部尚書封庸歷城侯食  
祿千石充平燕將軍總兵官代曹國公鉉叅  
贊軍務是年十二月戰東昌殺張玉三年三  
月大戰于夾河殺譚淵再戰敗走德州欲搗  
北平靖難兵長驅至淮上四年春夏間庸南  
趨靈壁齊眉山戰皆敗次于淮南六月靖難  
兵至浦口庸時還京口率兵出高資港結水  
寨拒戰靖難後致仕千戶王欽發庸罪狀陞  
欽指揮同知賞銀百兩未幾都御史陳瑛劾

庸口出怨言懷異圖遂削爵庸暴卒

駙馬都尉總兵官梅殷

梅殷河南夏邑人汝南侯思祖從子洪武十一年尚寧國公主爲駙馬都尉恭謹有謀勤問學能騎射諸駙馬中

高皇尤愛殷十九年勅殷提督山東學校兼理地方敕語謂殷篤學精通經史堪爲儒宗後嘗受密命輔建文君北兵起殷充總兵官鎮守淮安悉心防禦號令嚴明及師迫假道過

淮殷割使人耳鼻授之詞曰留汝口與殿下  
言君父恩義北兵竟不得道淮安乃渡泗水  
破盱眙出六合渡江至京師卽帝位殷尚擁  
重兵淮上

文皇迫公主招殷公主嚙指血爲書付李中使  
達殷殷得書慟哭詢建文君所在曰去矣殷  
曰君存與存君亡與亡吾姑竢之乃還京

文皇謂曰駙馬勞苦殷曰勞而無功

文皇寵賚甚至殷不能平時見詞色

文皇疑之每夜遣小中官潛入殷第察之殷愈  
怒都御史陳瑛言殷招藏亡命私匿胡人與  
女秀才劉氏朋邪詛幾得罪甲申冬早朝  
小舟經竹橋都督譚深指揮趙曦令人擠殷  
下水水淺不能沒奮舟駕其背而死乃言殷  
自投水死都督許成發其事

文皇怒罪深曦二人對曰此

上命也柰何殺臣

文皇大怒立命力士持金瓜落二人齒斬之謚



殷榮定初公主謂

文皇實殺殷牽衣大哭問駙馬安在

文皇笑曰爲公主蹤跡賊無自苦乃官其子一  
爲都督二爲指揮賜手書曰朕不念爾母爾  
安得至今日後俱改孝陵衛指揮使宣德中  
與世襲孫純舉成化辛丑進士爲知縣忤上  
官改襲前職官至中都副留守或曰公主嘗  
移書沮靖難兵

文皇不荅兵至淮北與公主書言興師不得已

故令遷居太平門外勿罹兵禍公主亦不荅  
公主

高皇后長女後稱大長公主

駙馬都尉都督僉事耿璿

耿璿濠人長興侯炳文子洪武中爲前軍都  
督僉事尚懿文太子長女江都郡主建文元  
年郡主進封公主璿爲駙馬都尉掌前府事  
璿勇悍有武略北兵起以玉璽懿親得預聞  
兵事炳文北征璿力勸直搗北平已而炳文

戰敗璿快快抱病時對公主悲泣建文遜去  
杜門稱疾竟以罪論死公主復稱郡主以憂  
卒